



Nabal refuse viures à Dauid, dont de courroux il le veut destruire ; mais par des presens Abigail appaise cette entreprife.

A PRES la mort de Samuël, Dauid descendit au desert de Pharan, près le desert de Maon, où vn riche homme nommé Nabal residoit, lequel auoit en Carmel trois mille brebis, & mille chevres. Or durant que Nabal tondoit ses brebis, Dauid se trouua en si grande disette de viures, qu'il fut contraint enuoyer dix iouenceaux vers Nabal, le prier courtoisement luy aider de viures à cét extrême besoin. Mais Nabal respondit dist : Qui est ce Dauid, ce fils d'Isay ? mes biens sont pour nourrir mes seruiteurs. Les iouenceaux rapporterent cette parole à Dauid, qui fit soudain armer ses gens pour aller contre Nabal, dont Abigail femme de Nabal fut aduertie par vn sien seruiteur, disant : Dauid a esté tousjours comme garde des biens de Nabal, parquoy ne luy faut refuser viures en sa calamité. Alors Abigail fit en diligence charger viures qu'elle alla presenter à Dauid, le priant humblement n'auoir égard au mépris & ingratitude de Nabal son mary : ce que Dauid acceptant, pardonna à Nabal, qui mourut dix iours apres ; parquoy Dauid enuoya querir Abigail pour femme, laquelle dit au messager ; Seigneur, ie suis la seruante de mon Seigneur, iusqu'à lauer les pieds de ses seruiteurs.